

## Pjesnički krug "Gračaničkog glasnika"

Nisveta **Kantardžić**

### TUROBNA TIŠINA

Samo korak tišinu remeti.  
Na nebu oblaci prividno  
nepomični,  
gusti i tamni,  
kao da su svi vjetrovi  
daleko negdje  
zauvijek zaspali.

Cvijeće malaksalo  
čeka kišu,  
ili rosu noćnu,  
dok umorna srca  
što mezari skriše,  
na sunce i tamu,  
na kišu i sušu,  
ravnodušni  
ostadoše.

Hajrija **Bećirović**

### ISTINE ŽIVOTA

#### (MINIJATURE)

1.  
Mala je želja da primi sve nade,  
a prevelika je za bol.

2.  
Konje njeguju oni  
što nemaju velike stomake, site,  
a jašu oni što imaju uzde.

3.

Na kraju se naši putevi razilaze,  
početak nam je bio sličan.

4.  
Čovječe, ne brini se:  
prva patnja ima kraj –  
na početku nove.

5.  
Pun tor ovaca,  
samo nam još vuk fali.

6.  
Patio od nesvjestic, a umro od neznanja.

7.  
Koji danas pjevaju,  
sutra mogu plakati

8.  
Ko sebi laže,  
ni drugom ne govori istinu.

9.  
Lahko je steći neprijatelja,  
teško je reći: imam prijatelja.

Muhamed **Dautović**

### SANJAM

Ja sanjam, ja te samo, naprosto, sanjam,  
u maglama gustim i vedrinama blistavim,  
u noćima, zvijezdama posutim, srebrnim,  
u danima, suncima obasutim, zlatnim.

Ja sanjam, ja te naprosto samo sanjam,  
i stihovi se cijede, pa se onda pažljivo nižu.



Petar Knežević, letač, kombinovana tehnika, Brčko, BiH (nagrada za kiparstvo)

U bistroima, u kazalištima, na trgovima  
i u svemu toplom, dragom i lijepom.  
Ja te samo sanjam, naprosto, sanjam  
i žudim da te ugledam na jutrima poezije.  
O, medena moja, nespokojan sam ti i sad  
dok pjesme o tebi u srcu gradskom te traže.  
*Zagreb 1988. godina*

Seada **Delić**

## PUTANJA MJESEČEVIH

### SJENA

Tiho protiče vrijeme,  
noć je zaključana.  
Oko nas  
brda stisnuta, gorda

i nijema  
rađaju mjesec  
u krošnji jasenova.  
Tamo je pjesma,  
mistična i zanesena,  
doziva nas  
žuborom šadrvana,  
u toplim kapima  
ogrezla jesen  
zlatom izatkana.  
U daljini  
godine  
zatočene,  
odzvanjaju zvukom  
djetinjih tabana  
mi vitlamo bijelu  
kosu vremena  
u procesu cikličnog nestajanja.  
Misao me ponese

putanjom mjesečevih sjena,  
a ja pustim svoju pjesmu  
da raste sa mjesecom  
u krošnji jasena.

**Mirza Dedić**

## JESEN

Tužna je jesen  
nema joj dijeta  
Divljaju ptice  
umire ševa  
Regruti plaču  
a ona gleda  
Zemlja je umorna  
i majka drijema  
Ubiše lane  
djevojka snena  
Bogu se moli  
tražeći hljeba  
Sve je u krvi  
kojeg li reda  
Svastika noćas  
za njih sprema  
Večera bješe  
od našeg mesa.

**Amir Mašić**

## PLAVE OČI

*(Mojoj učenicu iz prvog razreda)*

Jedna Đula,  
seka mala,  
nije šala,  
svakog dana,  
prije noći,  
izrazito  
ima lijepu  
plave oči.  
A u noći,

Ona ima  
Snene oči.

Zato Đula,  
seka mala,  
nije šala,  
svake noći  
u krevetu  
nježno sklopi  
snene oči,  
pa do jutra,  
nije šala,  
nježno spava  
seka mala

I dok ona  
na krilima  
slatkog sna  
tiho spava,  
odmaraju  
oba njena  
oka plava.

A ujutro,  
kada Đula  
horna skoči,  
kao nebo  
plave joj se  
opet oči.

**Mevludin Spahić**

## SUĐENI PUT DUŠE

Pređoh preko ruba dana  
Upraćen pozlatom nebesa.  
Svezan tajnom u zaspaloj tmini  
Prizivao sam izbušena sjećanja  
Dok sam gledao u sjene drugog svijeta  
I osjećao bauk praznine.  
Tjeskobom nemoći pentrao sam pogled  
Ka crnoj svili neba  
U kojoj će biti duša sahranjena.